



Broj: 05/01-05-13556/18 RA  
Sarajevo, 24.04.2018. godine

**SKUPŠTINA KANTONA SARAJEVO**  
**- o v d j e -**  
**n/r prof. Ana Babić, predsjedateljica**

**PREDMET:** Odgovor na zastupničku inicijativu – zastupnik Zvonko Marić

Zastupnik u Skupštini Kantona Sarajevo, Zvonko Marić, na 40. Radnoj sjednici Skupštine Kantona Sarajevo, održanoj dana 04.04.2018. godine, u okviru tačke Dnevnog reda "Zastupnička pitanja, inicijative i odgovori", a u skladu sa Poslovníkom Skupštine Kantona Sarajevo, pokrenuo je zastupničku inicijativu, kako slijedi:

*"Zbog poražavajućih informacija koje imamo, a koje nam nisu bile do sada dostupne - vezano za zagađenje zraka, vode i tla na području Kantona Sarajevo, zatim bujanju legalne, a posebno nelegalne gradnje u vodozaštitnim zonama i nadasve kada nalazi inspekcije o stanju kanalizacijskog sistema i sistema za odvodnju oborinskih voda - i kada se tome pridodaju sveukupne aktivnosti na Igmanu i Bjelašnici, jasno nam je da sve to utiče na kvalitet vode za piće, pojavu teških metala u pitkoj vodi kao što je olovo, kadmium i tako dalje, smatram kako je krajnje vrijeme da se jedna tematska sjednica ovog saziva Skupštine KS posveti zaštiti okoliša na području Kantona Sarajevo. Ja sam ovu inicijativu pokretao i ranije, čak mislim prije dvije godine. Nisam baš sretan što Vlada i Skupština KS nisu prepoznale tu potrebu.*

*Alarmantan je i podatak da u vodi koja je prema stanju iz predhodnih godina na graničnom nivou, tlo vodozaštitne zone na Vreću Bosne zagađenije olovom 20 puta više nego što je dozvoljeno. Stoga podnosim inicijativu da se održi ova tematska sjednica u roku od 30 dana. Prihvatam i to da inicijator održavanja ove sjednice bude Vlada Kantona Sarajevo.*

*Tražim pisani odgovor!"*

U cilju pripreme odgovora na predmetnu inicijativu, Stručna služba Vlade Kantona Sarajevo prosljedila je istu Ministarstvu prostornog uređenja, građenja i zaštite okoliša.

**Odgovor:**

Skupština Kantona Sarajevo je 31.10.2017. godine usvojila Kantonalni plan zaštite okoliša (KEAP) za period od 5 godina ("Službene novine Kantona Sarajevo", broj 47/17). KEAP sadrži pregled stanja okoliša u Kantonu Sarajevo, listu okolišnih problema i prioritete, akcioni plan sa ciljevima i mjerama, izvore finansiranja, te plan praćenja realizacije u 6 tematskih oblasti (priroda, vodni resursi, upravljanje kvalitetom zraka, zemljište, upravljanje otpadom i odgovori politika).



Pregled stanja okoliša u Kantonu Sarajevo je prezentiran prema DPSIR modelu, tj. okviru za opisivanje interakcije između društva i okoliša koji je usvojila Evropska agencija za okoliš. Ista metodologija je primjenjena kod izrade Federalne strategije zaštite okoliša 2008. - 2018. godina, sa kojom je KEAP trebao biti usklađen, shodno Zakonu o zaštiti okoliša Federacije Bosne i Hercegovine ("Službene novine FBiH", br. 33/03 i 38/09).

Izvještaj o stanju okoliša, kao temeljni sastavni dio KEAP-a je uključio analizu i sintezu uzročno - posljedičnih odnosa između različitih djelatnosti i okoliša, pregled stanja pojedinih okolišnih komponenti, pregled institucionalnog i zakonodavnog okvira sektora zaštite okoliša, pregled u oblasti obrazovanja u okolišu, te ocjenu nivoa javne svijesti po pitanju zaštite okoliša. Podaci koji su se koristili za identifikaciju početnog stanja okoliša u Kantonu Sarajevo su zadnji postojeći, raspoloživi i ažurni za svaku od razmatranih tematskih oblasti. Ocjena stanja predstavljala je osnov za definisanje 22 strateška i 70 operativnih ciljeva, odnosno pripremu akcionih planova po oblastima koji podrazumijevaju implementaciju 207 aktivnosti ukupne vrijednosti oko 220 miliona KM.

Treba naglasiti da je metodologija izrade KEAP-a osiguravala participativni pristup svih zainteresovanih strana putem radionica, organizacije okruglih stolova i javne rasprave za predstavnike općina, nadležnih ministarstava, kantonalnih javnih komunalnih preduzeća, zavoda, privrede, te akademske zajednice i NVO-a. Priprema KEAP-a je trajala više od dvanaest mjeseci.

Dakle, problemi navedeni u zastupničkoj inicijativi su kvalitetno elaborirani i mjere za njihovo rješavanje su utvrđene u akcionim planovima za tematske oblasti upravljanja kvalitetom zraka, a posebno upravljanje vodnim resursima za koje je procijenjeno da treba oko 82 miliona KM utrošiti u narednom petogodišnjem periodu, da bi se stanje popravilo u odnosu na početno definisano KEAP-om.

Između ostalog, kao jedna od prioritarnih mjera je usvajanje Odluke o zaštiti izvorišta vode za piće u Sarajevskom polju, kao i izrada elaborata, te inoviranje i donošenje novih odluka za preostala izvorišta u Kantonu Sarajevo. Nosioc realizacije ovih mjera je Ministarstvo privrede Kantona Sarajevo, zajedno sa Ministarstvom komunalne privrede i infrastrukture i javnim komunalnim preduzećima.

Imajući u vidu, da KEAP zbog ograničenih finansijskih resursa nije dao odgovore na sve identifikovane probleme, te da je rađen za petogodišnji period, predloženo je da se u okviru saradnje sa EBRD-om umjesto ponuđenog Akcionog plana za zeleni grad, uradi ažuriranje novodonesenog Kantonalnog plana zaštite okoliša, koji će sublimirati mjere koje će proizaći analizom novih oblasti energetike, saobraćaja i građenja. Navedene oblasti nisu direktno u nadležnosti sektora okoliša i nisu obaveza propisana Federalnim zakonom o zaštiti okoliša, ali izuzetno utiču na sve komponente okoliša, a naročito na kvalitet zraka.

Uz to, u okviru saradnje sa EBRD-om biće obezbijedena izrada Studije uspostavljanja zračnih koridora i sagledavanja uticaja visoke gradnje na kvalitet zraka u Kantonu Sarajevo, što je jedna od prioritarnih mjera iz KEAP-a, za koju su procijenjena potrebna sredstva od cca 200.000,00 KM.

Inače, Evropska banka za obnovu i razvoj je tokom vođenja razgovora vezanih za obezbijedenje kredita za obnovu vodovoda i kanalizacije, predložila da grant sredstvima Vlade Japana u iznosu od 300.000,00 Eura finansira pripremu Akcionog plana za zeleni grad. Pošto je primarna funkcija ovakvog plana zaštita okoliša dogovoreno je da se ne ponavljaju aktivnosti realizovane kroz izradu KEAP-a nego da se ovaj strateški dokument adaptira kao što je već rečeno. Vlada Kantona Sarajevo je na prijedlog ovog Ministarstva, na sjednici održanoj 19.04.2018. godine prihvatila prijedlog EBRD-a za učešće u Programu pripreme akcionih planova za zelene gradove



(GCAP), sa realizacijom projekta "Ažurirani akcioni plan KEAP za Kanton Sarajevo". U tom smislu, u periodu od 9 do 12 mjeseci trajaće priprema Akcionog plana za Sarajevo, koji će obuhvatiti i pripremu početnog izvještaja o političkom okviru, ažuriranje podataka o stanju okoliša, identifikaciju prioriteta za sektore, plan monitoringa, finansijske procjene i na koncu prijedlog izmjena i dopuna KEAP-a koje će biti predložene Skupštini Kantona.

Imajući u vidu navedeno, smatramo da ne treba prihvatiti predloženu zastupničku inicijativu, već se fokusirati na implementacija Kantonalnog plana zaštite okoliša.

S poštovanjem,

**MINISTAR**

**Čedomir Lukic, dipl.ing.arn.**

Dostaviti:

-  Naslov
- Stručna služba Vlade Kantona Sarajevo, ovdje
- Evidencija
- a/a

